

PIO R. SEAN

¡TALIKALÀ!

Drama sa duháka Bahin.

MGA TINAQ.

SOLEDAD, Ang asawa.
ROSARIO, Abyan ni Soledad,
GRACIANO, Ang bana.
GAUDENCIO, Kilala ni Soledad,
PABLO, Ugangan ni Gaudencio

Ginpaingprenta ni

Casimiro F. Perfecto.

Edicion propiedad del Editor.

MANDURRIO; ILOILO.

“LA PANAYENA”

Imprenta, Librería y Encuadernación
1916.

HALAD.

Sa duhá koka mahirup nga mga abyan,
duñgúg kag himayá sang Ilóng-ilong,
duhá ka mga pamatan-on nga may
magayón nga palaabuton,

Eliseo Hervás Salas

Bachiller en Artes

Licenciado en Filosofía y Letras

Profesor de Literatura Castellana en la Universidad
Filipina

Periodista y Literato,

kag

Francisco Varona

Bachiller en Artes

Profesor de Historia en el Instituto Burgos

Periodista y Literato

Ang tagsulát



¡TALIKALA!

Drama sa duha ka Bahin.



NAHAUNA NGA BAHIN.

Saguà sang isá ka baláy nga kasarangan sa pagkabutáng. Ganhàan sa likúd kag sa kilid magtimbang. Ang sa likúd padayon sa hagdaan kag ang sa kilid nga natóo sang guluàan padayon sa hulút nga tulugán, kag ang sa nawalá sang guluàan padayon sa digamuhán. Lamisa sa tungá kag pila ka siya maglibut sa lamisa.

— «O» —

NAHAUNA NGA GUA

SI SOLEDAD, SA OLIHI SI ROSARIO.

SOLEDAD—(*Nagapaninlo*) Ay, pangabuhí! Ang imo kalipay, ang imo himaya, ang imo kasadya, natigana gid lamang nimo sa mga táo nga daan may kalipay sa panóino, may himaya sa dughan kag may kasadya sa sulúd sang íla pagpangabuhí. (*Dulugan macadali. Sa mga matá*

nagaagay mapait nga mga luhà)

Apang sa nagakalisud, sa nagabatás,
sa nagabatyag na nga dian sa sulúd
sang dughan sing mga kasakit, yarà ang
imo kapintas . . . (*Nagapaninlò kag
nagahibi*)

ROSARIO—(*Gikan sa ganhaan nga nalikiud*)
Maayo nga aga, Choleng. ¿Maanóano ka?
(*Hakson kag halukán*)

SOLEDAD—Ay, abyan; kon iní nga cahimta-
ngan nakon may diotay pa nga kali-
pay, iná nga kalipay amó icaw, bula-
han nga tagiposoon nga walá pagaka-
hubsi sing kaawà sa nagabatás mo nga
abyan.

ROSARIO—¿Nga? ¿Amó man gihapon?

SOLEDAD—Walá gid paglubád; hinonòo gani
nga nagabangís.

ROSARIO—¿Nagabangís?

SOLEDAD—Hoo, nagabangís. Dili na maantus;
dili na mabatás. ¿Anano ang takús ko
mabuhat?

ROSARIO—Antusá, kay bana nimo.

SOLEDAD—¿Ngaa man nga may mga mag-
asawá nga ang ila pagpuyû makaililá,
kay latum sa kalipay ang sulúd sang
ila baláy?

ROSARIO—Kay nagahisahù; kay ang gugma
sang asawa kag bana nagaangay ang ka-
dalisay.

SOLEDAD—¿Kag ang walá magahisahùay? ¿Ang
walá magaangay ang gugma sang asawa
kag sang bana?

ROSARIO—Sa tungúd siná yarà ang matá nga
ginatubdan mapait nga mga luhà.

SOLEDAD—¿Walá na liwan?

ROSARIO—Yarà ang kasíngkasing nga magabatás

SOLEDAD—¡Kag. . . walâ na?

ROSARIO—A, yarà ang masubû nga lulubngan!

SOLEDAD—(*Maghibi*) ¡Lulubngan! (A, amo'y matam-is nga puluy-an sang may casaquit... (*Magtukyahaw sa iya paghibi*) Apang, Charing nalulutan ko nga abyan, ¡walâ na sing liwan nga macaluás sa aton sa kalisdanan, sa talikalá sang mabangis nga bana?

ROSARIO—Hoo, ang *divorcio*.

SOLEDAD—¡Kag anano ang *divorcio*?

ROSARIO—Amo'y kasugúan nga nagatugut sang pagbulagay sang bana kag sang asawa kon may dakú nga cabangdanan.

SOLEDAD—¡Anano nga mga cabangdanan?

ROSARIO—Pananglit kon ang bana mabangis, nga sa dalayon iya ginasakit ang asawa, sa tungúd siní ang asawa sarang makadangup sa *divorcio*; subung man kon ang asawa pananglit magtub sa bana, hanti ang bana makadangup man sa *divorcio*.

SOLEDAD—¡Kag anano?

ROSARIO—Kag ang bana sarang makapangasawa, subung man ang asawa sarang makapamana.

SOLEDAD—O, hamili nga casugúan!

ROSARIO—Hamili, kay nagapalinóng sang pagpuyû sang táo; kay nagaluás sa táo sa kapaitán sang pangabuhì. Dili bangúd kay ang bana magpangasawa kon makapilá ang luyag niya subung man ang asawa, nga magpamana kon makapilá, kay sa pag-asawahay nga matawhay, sa pag-asawaháy nga ang bana kag ang asawa naghigugmaanay sing tunay, walá sing *divorcio* nga sarang makalingkang.

SOLEDAD—Matuud, Charing. Ang magbulág sa isá ka bana, bisan pa iní sia malain, amó ang labí nga mapáit nga panumdumón sang isá ka asawa, apang kon dili na maan-tús, kon sa luyó sinâ nga bana lamang ang kasakit amó ang ginabaton sang asawa sa tanán nga tión, hanti walâ na sing liwan nga mahimú. . . .

ROSARIO—Ina nga casugúan nagapatawhay sang pagpangabuhì sang táo.

SOLEDAD—Apang, abi ang lalaki, sa paghingabút lamang sa isá ka babáe, iya iní ipakasal, kag kon mapakasal na niya, iya bulagán?

ROSARIO—Dili man mahimú.

SOLEDAD—Kay walâ sing kabangdanan?

ROSARIO—Hôo; kay walâ sing kabangdanan.

SOLEDAD—Hanti pintasán abi sang bana, kag kon indi, butángbutangan abi sing mga kasal-anan?

ROSARIO—Labí nga maayo, agúd ang babáe sa ila pagpamana dili magpahinalí, kondr ila gid anay kilalahon sing tungkad ang táo nga nagatuyò sa ila; panilagan kon putli balá ang paghigugma. . . .

SOLEDAD—Hanti, kay may mga lalaki nga sampaton magpuní sing bulak sa mahigkú nila nga batasan, nga makilala lamang kon makasal na?

ROSARIO—Hanti, bangúd sinâ yarà ang *divorcio* nga sarang dangpan sang kailo nga makatiplang, nga amó ang magaluás sa iya sa kabangís sang bana. Kon walâ sing *divorcio*, pilit na lamang nga magbatás siá.

SOLEDAD—Hamili nga kasugúan. Mahapús matuud ang magpamana, apang mabud-

- lay ang magpili sing banahon.
(Manumdum) ¿Mabulág akó kay Graciano?
 ROSARIO—Ambut sa imo. Hunâhunâa kag
 pasibûsibûa sing malawig kag madalum.
 Painóino ha kon magakalipay ka kon ma-
 kabulág na ikaw sa iya . . .
 SOLEDAD—Aparg maluás akó sa iya kaba-
 ngis. Walâ akó tuyò sa pagpamana, kon-
 di nga ang tuyò ko, nga mukaluás sa ma-
 pait ko nga kahimtangan.
 ROSARIO—Dili akó ang dapat magsugù sa
 imo, kondi ikaw ang dapat magpainóino
 sing malawig kag madalum.
 SOLEDAD—*(Maglingas subung' sang naga-
 panilag nga may nagasakà)*
 Siâ yanâ ang nagasakà. Ambut kon ana-
 no naman ang pagapaabutón kó nga pag-
 sakít niya . . .
 ROSARIO—Kon amó, ¿dili na gid maantusi?
 SOLEDAD—Pinulung ko na sa imo nga la-
 kás na. . .

• IKADUHA NGA GUA

SILÀ MAN CAG SI GRACIANO

- GRACIANO- ¿Buisít nga pagpangabuhil *(Tu-
 kason ang kaló kag ilampús)*
 ROSARIO - Maayo'ng aga Graciano. ¿Anano
 ang nahanabù? *(May tuyò sa paglingaw)*
 GRACIANO—Ay, Charing; nanurûysuruy. Na-
 ngita kabuhian.
 ROSARIO—Nagduaw akó sa imo asawa
 kay ginatan-aw ko nga daw paganiwang.
 GRACIANO - Maayo pa ikaw imo, Charing,
 kay walâ magapalibúg sang imo olo.

R
ROSARIO—Dili ka makasiling sinâ. Nagapalibûg akó sang akon olo bangúd sang pagpangabuhí, nga kon dili maalam ang táo, madali nga mahulug sa lungib sang kaisdanan.

GRACIANO—Mapait matuud.

ROSARIO—Mapait matuud kon makatabû ang babâe sing bana nga malain.

GRACIANO—Kag kon makatabû man ang lalaki sa asawa nga malain.

ROSARIO—Magpangalipay lang gani ikaw kay may asawa ka nga maayo, apangikaw...

GRACIANO—Apang akó malain. Hòo, naki lala ko ang ipulung nimo, apang dili maglain ang bana kon ang asawa maayo.

SOLEDAD—Hòo, Graciano, isugid naton sa tampad. Ngaa gid nga likman naton ang nagapanilág sang aton pag-asawaháy? Ako imo ginapaantus, imo ginapintasán.

GRACIANO—Hanti bumulág ikaw, kay luás ka man.

ROSARIO—Pagpakahinay kamo, kag patawara ninyo ako nga nagahilabut sa inyo, apang nangahás akó paghambal sing subung kay inyo akó ginabilang nga mahirup ninyo nga abyan. . . .

SOLEDAD—Bulág! Hòo, maluyag ikaw magbulág kay ikaw lalaki, apang akó nga isá ka babâe nga buhat, nga maluya . . . ay, ang lungib amó ang akon dalangpan.

GRACIANO—Kay tandà nga ikaw ang malain, kay kon akó ang malain, ayhan nagtal-as na ikaw.

ROSARIO—Panasa na ninyo ang malain, kon daw may malain, kay amó ang maayo, agúd magtawhay ang

inyo pagpuyû. Kon ang babâe ang malâin, tinguhâon ang pagbalhin sinâ nga kalâin agúd mag-ayo, subung man ang laki. (*Magtindug*) Amó na akó anay. . . (*Iao malakát na*) Balhiná ninyo ang inyo pagpuyû agúd ang himayà magbanâag sa inyo. (*Lacat*)

GRACIANO — (*Sang pagkalumbus na ni Rosario*) Anano ang ginpanugid nimo cay Charing?

SOLEDAD — Walâ.

GRACIANO — Tubtub diri imo ginapakità ang imo kalâin, bañagâ.

SOLEDAD — (*Maghibi*) Akó ang imo ginapakalâin sing ang tanán ginaantus nakon. (*Maghibi pa gid.*) Ikaw nga ang imo pilak sa sugalan kag sa mga babâe nimo ginayákyák, ikaw nga dili ganì makadumdum sang akon pagkaon, ikaw nga sa walâ sing kabangdanan magapintas sa akon, ikaw ang maayó; apang akó nga kon makakàon tungud sang kalooy sang mga abyan, akó nga nagabatás sang imo kabangis, akó nga imo ginapintasán, ako ang malâin. . . .

GRACIANO — Cholang. . . hinugay na . . . (*Palapitan kag hanâon nga kug-on*) Sin-o ang nagsugid sa imo nga may mga babâe ako? Sin-o?

SOLEDAD — Mahimò nga kug-on nimo akó kay amó na ang imo batasan, kay akó maluya, apang ang matuod dili na pagtagua. . . . (*Nagahibi gihapon*)

GRACIANO — Cholang. . . . (*Tulukon masakit si Soledad nga daw iya lamunon*)

SOLEDAD. Hòo Graciano... ang matuod, matuod. Ikaw walâ mahagugma sa akon, ikaw

walâ pagpalangga sa akon . . .

GRACIANO- Hanti kay nakilala nimo, ngâa walâ nimo akó bulag?

SOLEDAD—¡Bulag! ¡Bulag! amó ang imo ginahulât kay walâ ka paghigugma sa akon. ¡Kag ngâa balâ sadto imo akó ginkuha sa sabak sang akon mga ginikanan?

GRACIANO—Dapat mo masayuran nga ginpa-ngasawa ko ikaw kay may dumut akó sa imo mga ginikanan.

SOLEDAD—¡Gali? ¡Kag akó ang imo ginbalusan?

GRACIANO—Kon daw dili ka makabatás, sarang ka makabulag. (*Kuháon ang kaló cag davon lakát*)

SOLEDAD—¡Bulág! ¡Bulag! Diwa kol . . . ¡Kag sin-o ang akon dangpan? ¡Akó nga isá ka maluya nga babae . . . (*Dulugan kag maghibi*) Ang lungib, ang lungib amó ang akon puluy-an, ang kasakit amó ang akon abyan kag ang pagbatás amó ang akon anino . . . A, masubû nga kahimtangan . . . (*Masubû sa ganháan nga naualá*)

IKATLO NGA GUA

SI GAUDENCIO, SA OLIHI SI SOLEDAD

GAUDENCIO—(*Subung sang sa idalum*) Tagbaláy . . . (*Magpakitá sa ganháan nga nalikud*) Maayo'ng aga diri . . . (*Mangilágkilág*) ¡Wala sing táo?

SOLEDAD—(*Sa sulúd*) ¡Sin-o inat

GAUDENCIO—Akó, Choleng . . .

SOLEDAD—(*Maguá*) Dayón. . . Pungu. Gauden.

GAUDENCIO—(*Magdayón cag maglingkud*) ¡Diin si Graciano?

SOLEDAD—Bag-o pa lamang yadto magpanaug.
(*Ginatagù ang kalisud*)

GAUDENCIO—Nagkarí lang akó kontani. . . (*Si Soledad nagahibí kag sang pagkakità ni Gaudencio walá magpadayon sang iya íham-bal*) Apang pakigkitàan ko na lang si Graciano. . . .

SOLEDAD—¿Ngaa, anano balá?

GAUDENCIO—Nagakalisúd ka, kag dili akó magdugang.

SOLEDAD—Walá á, kundì ang matá ko nga sinudlan sang ambut kon anó nga sapat.
¿Anano balá ang tuyù mo sa iya?

GAUDENCIO—Ind. á, kay ang akon utud may sulát sa akon nga sukton lo si Graciano sang utang niya.

SOLEDAD—¿Pila ang utang ni Graciano?

GAUDENCIO—Kalim-an ka pisos man lamang.

SOLEDAD—Jesús (*Sa kay Gaudencio*) ¿Sa anó inâ nga utang?

GAUDENCIO—Ambut man gani á.

SOLEDAD—¿Dugay na?

GAUDENCIO—Sang Semana lang nga nagligad.

SOLEDAD—(*Nagahibi*) ¡Jesús! Kag bisan lalong lang sang amó nga kuarta walá gid akó makakità . . .

GAUDENCIO—A, dili gid man inâ ginasakuan sang akon utud. Magakitàáy lang ugaling kami ni Graciano.

SOLEDAD—Walá gid dumduman. . .

GAUDENCIO—Nagakalisud ka, Choleng, kag dili na nimo matagù. Patawara akó nga nagdugang sang imo kalisúd.

SOLEDAD—Hoo, Gauden, ngaa igkahuyà ko. Nagakalisúd akó bangud sang kabangis sang akon bana nga yanâ. (*Naghibi*)

GAUDENCIO - Amó gid inâ dirí sa idalum sang kalibutan; may nagakalalipay kag may nagakasakit, Akó nagakalisud man. . .

SOLEDAD—Kay kon ang bana walâ gani paghigugma sa asawa, lamang kapintas ang ginamuma. . .

GAUDENCIO—Subung man nga ang asawa kon walâ gani paghigugma sa bana, ang kaddinganan ginadagtaán . . . (*Liwanon ang pangatingug*) Amó gid inâ. . . mga hampangan kitá sang aton kapalaran nga ginadapadapya sang balúd sang pangabuhí. . . . ¿Ngàa abí taguon ko pa? Sang una ginahigugma ko ikaw, kag kon ikaw ang na pangasawa ko, ayhan sa karon walâ palaligban ang olo co. . .

SOLEDAD—Pabayà inâ nga mga hambalanon Gauden. Tuluka nga amó na iní ang kahimtangan naton kag walâ na sayud nga maghambal kitá sinâ nga butáng. . .

GAUDENCIO—Patawara akó . . . (*Matindog nga buot Malakat*) Patawara akó, kay dili man amó ang tuyò nakon, kay yadto kay nagligad na, aton dapat kalimtan. (*Lakat*)

SOLEDAD—(*Maghibí*) Hèo, badlit nga malaut nga hinatag sang mga langit. Antusón kay daw malapít na lamang ang akon kamatayon. ¿Ngàa man nga amó iní ang nagakahanabù sa kalibutan, nga ang nagahigugmaanay dili mag-asawaháy, agud maghimayà sing himpit? Inâ si Gaudencio naghigugma sadto sa akon. . . (*Subung sang buot kalimtan ang matatog nga hunahuna*) ¿Apang palayô kamo sa akon! Yadto kay nagligad na pilit nga kalimtan. A, ang gugma nga dalisay kon masimbungan sang

gugma nga hapaw, subung sang kalamay
kag apdu nga kon simbugón, ang ka-
paít dili madaúg sang katam-is. (*Sulud*)

IKAP-AT NGA GUÁ

SI GRACIANO, SA OLIHI SI SOLEDAD.

GRACIANO—Choleng. . . . (*Mabaskug ang ti-
ngug*)

SOLEDAD—(*Maguá*) ¿Anano? (*Malulut*)

GRACIANO—(*Nagabalingasú*) Ikaw nga babáe,
ambut kon ginapangitá gid nimo ang imo
kalàinan. Maluyag ka naman nga palasán
ang matupâ sa likud nimo. Walá ka gid
kadudlâan.

SOLEDAD—¿Ngáa balá? (*Mahinay*)

GRACIANO—Karón, ang pinaabút mo ang ma-
tagasák na'man ang nawúng n:o.

SOLEDAD—¿Apang anano balá ang salâ ko?

GRACIANO—Ang pisos sa akon bolsa imo
ginkuhà? Walá ka makasayud nga madamù
ang balayran ko? ¿Diin ang pisos?

SOLEDAD—Ginbakal ko man pagkàon.

GRACIANO—Makahas ka gid nga banyagâ ka.

SOLEDAD—Amó man inâ ang maayo; ang
mangawat sang pilak nimo, kay kon indi
akó magpangawat, sa babáe lang nimo ma-
kadto ang tanán. (*Sulud*)

GRACIANO ¿Ha? (*Sundun*) Madudlâ ka gid.
(*Sulud*)

SOLEDAD—(*Magtinagasak sa sulud*) Tabang,
ay. . . . patya na lang akó. . . .

GRACIANO—(*Maguá nga nagabalingasó*) Tan-
dàan mo. Sa sini, magabulág ka gid sa akon.

KUMBUNG

IKADUHÁ NGA BAHIN.

Guá sang isá ka baláy nga inimol; nipà kag kawayan ang dingding. Ganhaan sa kilid lamang magtimbang; ang sa natò sang gumulua mapadayon sa hagdanan kag ang sa nawalá mapadayon sa hulút nga tulugán May apat ka siya nga kawayan kag isa ka lamisa nga kahón sang gás.

NAHAUNA NGA GUÁ

SI SOLEDAD CAG SI GAUDENCIO.

GAUDENCIO (*Subung sadto'ng nagahambalanay na silá nga daan sang pagbukás sang kumbung*) ¿Nakità mo Choleng? makalolòoy ang aton pagpuyù, Imol kita....

SOLEDAD—Hòo, imol kitá apang himpit ang aton kalipay kag buganà ang himayà sang dughan. A, Gauden, amo pa lamang iní ang akon pagkásayud kon daw anó ang putli nga gugma. Sadto walá acó makakilala sina'ng ila ginatawág himayà sa sulúd sang pagkabuhí sang táo, (*Maghibi*)

GAUDENCIO---Kon nagakalipay ka, ngàa caron nagahibi ka?

SOLEDAD—Akon ginahibi'án ang akon kapalaran nga nagligad, kay walá akó magkilala sang putli nga paghigugma....

GAUDENCIO—Pabayài yadto'ng nagliligad na. Nián aton kalipayan ang aton kapa-

laran, nga bisan sa olihi, apang naghatag gid man sa aton sang himaya nga amo sadto ang nakulang sa aton....(*Si Soledad nagahibi gihapon.*) ¿Apang anano pa ang ginahibi mo? ¿Anano pa ang ginakalisud mo?

SOLEDAD—Ang maghunahunà nga basi dili ikaw makaunung sa akon tubtub sa kamatayon....

GAUDENCIO—¿Nagapangduháduha ka?

SOLEDAD—Amó ang nagasakit sa akon....

GAUDENCIO—(*Magginhawa sing malawig.*)

Háy, Diwa ko....

SOLEDAD—Ti kondi nagahinulsul ka....

GAUDENCIO—Walâ akó magabinulsul, walâ.

Sa subung sini bisan isahón lang kitá sing lulubngan. Ang ginakasakitan ko kay dili ko ikaw mapapati sang tunay ko nga paghigugma. Halus ako manginmatay sa subung sini, agúd imo makita nga sa subung sini handà akó sa pag-unung sa imo kay ginapakatam-is ko nga sa sabak mo mahunus ang-akon ginhawa. . . .

SOLEDAD—¿Nagakalipay ka sa luyó ko?

GAUDENCIO—Nasilíng ko na sa imo, apang sa gihapon suliton ko. Sa mga luyó nimo walâ akó kamatayon. . . .

SOLEDAD—A, Gauden, buot ko nga sa gihapon imo suliton ang imo mga panug-an, kay tagsa nimo ka pagsulit tagsa man ka silak sang himaya ang nagabanaag sa akon kasíngkasing.

GAUDENCIO—Masayuran mo Choleng nga walâ pa akó makabatyag kalipay subung sini'ng kalipay nga iní'ng nagatan-ay sang dugòs nga mayuyum sa aton. Ang ginakalisdan ko kay sa subung sini walâ akó iga-

pakalipay sa imo. . . (*Masubú*) kay walà akó palangitan-an sing pilak.

SOLEDAD—Bisan sa dahon lamang sang kahoy magakabuhì kitá. . . .

GAUDENCIO—Apang dili mahimù. (*Subung sang nagahambal sa iya lamang*)

SOLEDAD—Dili ka magpalibúg sang imo olo. Tuman na akó nga mabusug sang himayà. Himayà lamang ang akon ginapangitá kay amó ang nawalà sa akon. Busúg akó magtuluk nga imo akó ginapalangga.

GAUDENCIO—Hèò, ako amó man, apang mapatay kitá sa gutum.

SOLEDAD—¿Anano gid man? Mapatay kita sa gutum, apang mamatáy nga may himayà ang dughan. (*Lainón ang pangatingug*) Abi sugilanoni akó, Gauden. (*Subung sadtong buot niya lingawón*)

GAUDENCIO—¿Ano ang isugilanon ko?

SOLEDAD—Ang imo maragtas, ang imo ginagihan. . . .

GAUDENCIO—Masubú. Nalugum sang mai-túm nga duág sang kasakit.

SOLEDAD—Subung man sang akon. Apang isugilanon.

GAUDENCIO—Lanubù pa akó kag akon ikaw mahakit an; magayón ka, maanyag, nga sa gilayón sa sulúd sang akon dughan ginsimba ko ang imo kagayón kag kaanyag. ¿Nakadumdum ka? Nagsulát akó sa imo apang walà nimo akó pagbalusi. Sumulát akó liwán sa imo; makatatlo, apang walà gid ikaw magbalus. Kutub sadto nagpalibúg akó sang akon olo. Natabù gid sadto nga buot akó pasakyon sang akon amáy sa Manila, kag nagsakáy ako. Tatlo akó ka

túig sa Manilá, kag akon mabaton ang masubû nga balitá nga ang akon amáy napatáy. Sanglit kay isa lang ako ang lalaki niya nga anak, pumauli akó diri sa pagtatap sang amon pangáma, kag sadto nga nga túig may bana na ikaw. Maduhá ka túig bumulik akó sa Manilá su pagpadayon sang akon pagtòon, kag didto akó makapangasawa sa isá ka taga Pangpangga, nga akon nasayuran sang olihi nga walá galí paghigugma sa akon. . . , Apang anhon ko kay amó ang akon palad. Batasón. . . . Apang sini'ng olihi dili na gid maantus. . . . (*Magpakitá nga nagapanalisud*) Sadto Choleng, imo gintal pan ang ganhàan sang imo dughan sa mga panghayhay sang akon tagiposoon kag amó ini ang kabangdanan nga nagsimáng kitá sing dalan. . . .

SOLEDAD—Iya sang langit pagbút . . . (*Maglingas*) Daw may nagasaká. . . . (*Manilag*)

GAUDENCIO—¿Sin-o ayhan?

IKADUHA NGA GUA

SILÁ MAN KAG SI ROSARIO

SOLEDAD—(*Nakibút*) ¡Jesús! ¿Ngáa? (*Palapitan ni Soledad*) ¿Anano ang nahanabú?

GAUDENCIO—(*Mapalapit man kay Rosario subung sadto'ng maluyag makasayud sang nahanabú*) ¿Ngáa.

ROSARIO—Sa banwa kamó lang ang ginawakal sang mga táo. Ginakangilarán nila ang buhat ninyo. Apang walá siag may nakasayud nga yari kamó diri. . . .

SOLEDAD—¿Kag ikaw, ngáa nakasayud?

ROSARIO—Kalalangan sang pagpakamahat ko sa imo, Choleng.

GAUDENCIO—Kag anano ang mga hambal sang mga táo?

ROSARIO—Nga konó si Choleng damák nga babáe, kay nagdagta sang iya kadunggan sa pag-upúd lamang sa isá ka lalaki, kag ikaw (*Itudló si Gaudencio*) malain nga lalaki kay sa isá ka malain nga babáe imo ginpakalisúd ang imo asawa.

SOLEDAD—Diwa kol (*May pangalisúd*)

GAUDENCIO—Pabayai silá sang luyag nila nga ihámbal, kay ang mga kailó walá makasayud sang ginkamunuan siní nga tanán. Pabayai silá kay walá makatalastas sang sa sulúd sang dughan sang táo nagapugad, nga amo'y gugma. Kailo nga mga táo.

SOLEDAD—Kag anó ang saráng naton mabuhát?

GAUDENCIO—Ang magpuyú sing malinong sa tungá sang kahimayaan sang tunay nga gugma. Pabayaan naton silá kay walá makatalastas sang tanán. . . Ang mga kailo walá sing salá, kay ang ila, ginatulok nila ang mga butáng sonó sa nagakahanabú, apang walá nila pagakilalaha ang mga kabangdanan. . . Kay walá nila matalastasi. . .

ROSARIO—Hèo, magpakalinóng . . . Manaúg akó anay kay manilag akó sang hinuring-huring sang táo. (*Lakát*)

GAUDENCIO—Malakát man akó

SOLEDAD—Kag akó diri nga isá lamang?

GAUDENCIO—Anano ang nahadlukán mo? Yari ang revolver akon ibilin. Mabalik man akó gilayón. (*Ihatag ang revolver kag*

daw-on niya.)

SOLEDAD—Dumali ka gid, ha?

GAUDENCIO Madali gid lamang. (*Lakát*)

SOLEDAD—Hòo, nakaluás na ako sa kaba-
ngis sang isa ka táo nga walá'y kalooy.
Bisan mamatáy pa ako sa subung siní. Ta-
mà nga pagbatás, tamà nga pagpangalisúd,
sa katapusan may kaluasan gid man. (*Ma-
numdum*) ¿Apang basi kon ginapasalig
lang akó ayhan ni Gaudencio? ¿Basi kon
ginhimuslan lang niya ang kaluya sang
akon kasingkasing bangúd sang lakás ko
nga pagpangalisúd? Hanti manginmatáy ako,
kay ayhan amó na gid ang pagbuót sang
mga langit. Hanti, matapus na ang tanan.
(*Manumdum*) Apang dili makabudhi sa
akon si Gaudencio... Kutub pa sadto iya
akó ginhigugma...

IKATLO NGA GUA

SI SOLEDAD KAG SI ROSARIO

ROSARIO (*Kutub sa idalum*) Choleng...

SOLEDAD (*Sa iya lang*) Si Charing... (*Suga-
ton sa ganháan*) ¿Anano nga pagkabutáng?
(*May dakú nga kabulung*)

ROSARIO—Nagbalik akó kay nalantawán ko
si Pablo...

SOLEDAD—¿Sin-o nga Pablo?

ROSARIO—Ang ugangan ni Gaudencio.

SOLEDAD—¿Hanti?

ROSARIO—Basi kon makit-an niya akó kag
masayuran niya nga yari diri si Gauden-
cio, gani kay nakasayud sia nga daw mag-
utud gid kita.

SOLEDAD — ¿Kag anano abi ang buhaton niya?
ROSARIO — Walâ kitá malasayud.

IKAP-AT NGA GUÁ

SILA MAN KAG SI GAUDENCIO

GAUDENCIO—(*Kutub sa idalum*) Choling. . .

SOLEDAD—(*Sugaton si Gaudencio*) Gauden. . .

¿Anano ang dalá mo?

GAUDENCIO—Diotay nga cabuhian. (*Ibutang sa lamisa ang iya mga dalá*) Gatas nga akon nabakál sa manoggatás, itlog. . . .

(*Himuón*) Mamahaw kitá anay.

ROSARIO—Pamahaw lang kamó, kay akó akon busúg.

SOLEDAD—Dili mahimù. Sa kalisúd kon sa kasakit updi kami; sa gutúm kon sa kabusúg, ambití ang amon kahimtañgan.

ROSARIO—Tá, mainúm lang akó sang gatas. (*Mag-inúm silá*) Ti, amó na akó anay. Sa dili ninyo masayuran yari akó diri kay magabalik akó sa paglingáw sa inyo. (*Lakat*)

SOLEDAD—¿Anano ang batibati nimo?

GAUDENCIO—Dili ka na magpanumdum sang mga halambalanon sang mga tao. Amó gid iná ang mga tao, mahambal gid. . .

(*Dulugan*)—Apang ang akon gid ginakalisdanan kay dili ako makapatuyang sa imo. . .

SOLEDAD—Ayaw magpanumdum sina, Gauden. Akó natáo man sa payágpayag. . . .

GAUDENCIO—¿Walâ ka magahinulsul siñ'ng aton nadangatán?

SOLEDAD—¿Ako magahinulsul? ¿Kag ngaa? ¿Dili balá hamili ang aton gugma?

GAUDENCIO—Apang kitá man lamang ang

máy sayúp. Sadto kay sa xaton dughan hamili man nga gugma ang ginabatyag naton, ngaa balá walá naton pagsimbugá yadto nga gugma naton? Ngaa? (*Ma. mangcot sa iya man lamang*)

SOLEDAD=¿Walá ka. balá makabasa sadto'ng?

"Mar de contrariedades es la vida
y los hombres son barcos que navegan
que al llegar la caricia enfurecida
de la suerte, en dolor todos se anegan'."

GAUDENCIO=Hòo, matuod nga lawúd nga malapad ini'ng pangabuhì kag kitá nga mga táo mga layá nga dahon sang kahoy nga ginadapyadapya, kag walá naton masayuri kon dín kitá nga hilit idagsa. . .

SOLEDAD=Apang sa olihi, nagasiling man sing:

"Ahora bien, si ruta diferente
hemos trazado al cruzar el desierto
quiera Diós que al final y frente a frente
nos encontremos en un solo puerto".

GAUDENCIO - Hòo, hòo. (*Madalum ang dumduman*)

SOLEDAD - ¿Nagakalisud ka?

GAUDENCIO=Walá, kondi nagapanumdum akó nga mangita pagkaon.

SOLEDAD=Ayáw ka magpalibúg sang olo nimo kon tungud lang sinâ. Dili kita magkaon.

GAUDENCIO - Dili mahimu. Magkabuhì kitá sa pagpangalipay. Manaúg akó anay.

SOLEDAD - Dili ka magdugay. (*Lakat si Gaudencio*) Matawhay na ang dumduman ko, kay ang humili nga dugús sang gugma amó ang ginakabuhì sang akon tagiposón. Ang táo, agúd magkalipay, da-

pat magpasilong sa mabugnaw nga landung sang tunay nga gugma.

IKALIMA NGA GUÁ

SI SOLEDAD KAG SI PABLO

PABLO==(Sa idalum) Tagbaláy. . .

SOLEDAD==(Magtindog subung sang may kahadluk) ¿Sin-o? (Manilag)

PABLO==(Sa idalum man gihapon) Tagbaláy...

SOLEDAD---Dili ko kilala ang tingug. (Masulúd)

PABLO--(Sa idalum man gihapon) Tagbaláy....
(Maguá) Ayáw na magpanagù. . .Nasayuran ko nga yari diri ang naghalit sa akón anák.

SOLEDAD---(Maguá nga ginapalícud ang revolver) ¿Akó ang ginapangitá mo?

PABLO--Hèo, ikaw. (Nagakulukadlao) Ikaw mahigkù nga babáe, ang ginapangitá ko.

SOLEDAD---¿Mahigkù ang pulung nimo? ¿Ngàa nakadangat ka magpulung sing subung?

PABLO---(May kaakig) Dili pa ikaw busúg nga imo gindagtán ang dungúg sang bana nimo, ang ibán nga panimaláy imo pa ginalitan....

SOLEDAD---Tiyò Pablo, hinaya lang kon naghambal ka, kay walâ ka makasayud sang gincamunúan.

PABLO--(Magkadlaw nga hilaw) Nakasayud akó. Naluyag ka kay Gaudencio kag imo gintis-tísan ang akon anák nga amo'y asawa niya. Mahigkù ka nga babáe.

SOLEDAD--(Bayawon ang revolver kag ipatumtum kay Pablo) Tiyò Pablo, hináyhinaya ang imo hambal kay masakít nga pamatian ko.

Akó dili malain nga babae. Ang anak mo amó ang mahigkù nga babae...

PABLO=(*Mahinay*) Apang ikaw nagtò sa mga panug-an ni Gaudencio...

SOLEDAD=Dili tungúd kay Gaudencio ang akon ginbulág sa bana ko: dili ka maghuhunà sing subung. Ginbulágan ko ang bana ko kay mapintas, kay dili na mabatas ang iya pagpakalisúd sa akon.... Kag si Gaudencio nagbulág sa anak mo kay ang anak mo maluib.

PABLO---Magapati akó kon tungúdsang kabangdanan sang imo pagbulág sa imo bana, kay ang isá ka asawa dili gid matòd magbulág sa iya bana kon abi ang bana dili gid tamà ka pintas, apang kon tungud sang kaluib sang anak ko, sonò sang imo ginapamulung, inà butángbutang lamang ni Gaudencio, ayhan sa pagbutig kag sa pagpatò sa imo.

SOLEDAD=Bisan pa, walà ka katarungan sa pagpasipala sa akon.

PABLO—Patawara akó. Apang kailo ka nga ginbutigán ni Gaudencio.

SOLEDAD Ginatooan ko kay amó ang iya sugid, kag ako nagalaum nga diri sa kalibutan amó iní ang mahanab; nga ang bana luiban sang asawa, kag sa tungúd siní ang bana sarang makabulág.

PABLO—Ikaw ginpasalig lang ni Gaudencio nga magabulág siá sa iya asawa, apang dili mahimò.

SOLEDAD—Ngaa dili mahimò?

PABLO—Kay sa bana kag sa asawa may mabakud nga talikalà nga nagahigút nga sa kamatayon lamang mabugtò

SOLEDAD—Yarà ang *divorcio*

PABLO—Ti, kondi ginpasalig lang ikaw ni Gaudencio.

SOLEDAD—¿Ngaa?

PABLO—Kay diri sa aton sa Pilipinas walà sing *divorcio*. Gani ang bana kon asawa man nga magbulág sa iya asawa kon bana man. Kag magpangasawa liwán saráng masumbung sa salá nga ginatawág *adulterio*.

SOLEDAD—(Manumdum: Sa luás) ¿Matuod ayhan? Apang walà man akó magasalig kay Gaudencio...Dili siá ang tuyó ko sa pagbulág kay Graciano....

PABLO—(Sang iya mapanilagan nga nagdalum ang dumduman ni Soledad) Amó na akó anay.... (lakát.)

SOLEDAD ¿Matuod ayhan? ¿Ginbutigan akó ni Rosario? Apang si Rosario dili makabutig sa akon. (Dulugan) Ginahadlukon akó, kon basi sa paghingabút ni Graciano nga makapakasal liwán, nga dili masumbung sa *adulterio*, iya akó patyon... kag isiling nga akon siá ginluibán....A, tuman na ako siní. Sa tunga siní nga pagpangalisúd pagkatamis sang kamatayon. (Masulúd kag maguá nga walà na revolver)

IKAN-UM NGA GUA

SI SOLEDAD KAG SI GAUDENCIO

GAUDENCIO—(Magua gikan sa ganhaan nga natóo) ¿Ginlangkag nimo akó, holeng? (Ibutang ang mga Dalá nilá niya)

SOLEDAD—Hoo, bangúd sang pagpalangga ko sa imo. (*Dulugan makadali*) Gauden, pilá ka tagâ agud magsalig ako. ¡Matuod nga ginahigugma nimo alo? (*May anggá*) ¡Matuod nga pagaunungnan nimo akó?

GAUDENCIO—¡Apang, may pangduháduha! a?

SOLEDAD—Hanti, mapakásal kitá nga duhá, agúd mahimpit na gid ang aton kalipay....

GAUDENCIO—Dili mahimù, Choleng.

SOLEDAD—¡Ngaa?

GAUDENCIO—Kay walâ igatugut sang kasugúan.

SOLEDAD—¡Walâ balá igatugut nga ang bana magbulág sa iya asawa kon ang asawa malà in, subung man nga walâ balá igatugut nga ang asawa magbulag sa iya bana kon ang bana malàin? Kag makapakasal ang tagsatagsa?

GAUDENCIO—Walâ: kay sa asawa kag sa bana may talikalâ (*Sa pagbungát sang tinagâ nga Talikalâ, iya baskugón*) nga nagahigút, nga lamang ang kamatayon amó ang makabugras. (*Masubú*)

SOLEDAD—(*Madalum ang dumduman*) ¡Diwe ko! ¡Lamang ang kamatayon! ¡Matuod nga ginlimbungán akó! (*Masulúd, kag lamang nga makasulúd lumupúk*)

GAUDENCIO—(*Sang pagkabatì sang lupúk*) ¡Choleng! ¡Choleng!...(*Sulúd*) Choleng...(*Sa sulúd*) ¡Diwa ko! (*Maguà nga iya ginaalay-ay si Choleng sa iya duha ka butkon, kag palingkurón sa siya, apang patáy na. Iya panilagan ang kibú sang dughan.*) ¡Patay, Diwa ko! ¡Tungúd sa talikalâ nga lamang ang kamatayon ang makabugras! (*Masulúd man kag lamang makasulúd lumupúk man.*)

Maguâ) ¡Banyagà nga talikalâ, nga lamang
ang kamatayon amó ang makabugras! (*Ma-
pukan sa luyó sangbangkay ni Soledad*)

KUMBUNG.

KATAPUSAN.



PATIMAAN.

Ang tanán ñga maluyag magpaguá sini ñga drama kinahanglan magpa-ñgayó sang pahanugut sang tagsulát kag magbayad sang hinakay ñga ginasukút. Ang mga sulát saráng mapadalá kay Pio R. Sean, Ø, “La Panayana”, ni C. F. Perfecto, Mandurriao, Iloilo.

Ang magpaguá ñga walá pahanugut sang tagsulát igasumbung sa hokmanan.

Ang tagsulát.